

肅寧縣志卷之四

典禮志

敦典者必庸禮奚獨秩序之五哉朝祭賓養一邑具焉夫

天顏咫尺而畿甸去天尺五朝儀尤肅他如迎春東郊鞭土牛趨稼事縣職也而春秋祭禘率其事於鄙師月吉讀法未嘗殊其事於州長黨正况飲老於庠與賓於鄉又邑宰之所宜祇厥公事者數典考禮能勿備乎志典禮

朝賀

歲每值

聖誕冬至元旦邑令朝服率僚屬先一日於公所習儀
設儀仗鼓吹前導迎

龍亭供縣堂屆期五更行三跪九叩首禮畢奉亭原所
迎詔

凡承

詔勅縣令朝服率僚屬出郭具

儀仗鼓吹前導迎至大堂作樂行禮跪聽宣讀畢

復行禮如制

迎春

立春先一日邑令率僚屬於東郊外祭

勾芒之神迎神及土牛至縣儀門外芒神位東西向
土牛在西南向屆期昧旦各官朝服設酒果行三
獻禮各執絲仗首領官擊鼓三聲環鞭土牛三匝
而退

祭祀

社稷壇

每歲春秋仲月上戊日邑令率僚屬詣邑西壇設

縣社稷神位朝服行三獻禮祭品社位羊一豕一

帛一爵三釂一邊四

棗栗鹽薤魚

豆四

韭菹醢醢

簋二

黍簋二

稻粱

稷位同

祭文

維神奠安九土粒食萬邦分五色以表封圻育三農而蕃稼穡恭承守土肅展明禋時屆

仲春秋敬修祀典庶九九松栢鞏磐石於無疆翼翼黍苗佐神倉於不匱尚饗

風雲雷雨山川壇

歲春秋仲月上戊日邑令率僚屬詣邑南壇朝服行三獻禮壇設三位風雲雷雨之神居中本縣山

川之神居左本縣城隍之神居右祭用羊三豕三
帛三爵各三鉶一籩豆簋簋與西壇同

祭文

維神贊襄天澤福祐蒼黎佐靈化以流形生
成永賴乘氣機而鼓盪溫肅攸宜磅礴高深

長保安貞之吉憑依輦固實資捍禦之功幸民俗
之殷盈仰神明之庇護恭修歲祀正值良辰敬潔
豆籩祇陳牲幣尚饗

先農壇

歲二月邑令率僚屬朝服詣邑東北壇具羊一豕
一帛一鉶一爵三籩豆簋簋同社稷壇三獻禮畢
知縣更蟒衣秉耒耕籍典史執青箱老農一人牽

牛農夫二人扶犁九推九反農夫終畝畢望闕行

禮

祭文

維神肇興稼穡粒我烝民頌思文之德克配
彼天念率育之功陳常時夏茲當東作咸服

先疇洪惟九五之尊歲舉三推之典恭膺守土敢
忘勞民謹奉爨章聿修祀事惟願五風十雨嘉祥
恒沐於神庥庶幾九穗雙岐上瑞頻書於大有尚饗

雩祭壇

每歲四月奉文日邑令率僚屬詣雩壇行三獻禮
乾隆八年定制於風雲壇內行雩祭爲常雩禮祭
風雲雷雨山川社稷先農之神具帛五爵各三鉶

一簋簋各二籩豆各四羊一雞一酒尊一又有因

旱而雩之祭

祭文

恭膺詔命撫育羣黎仰體彤廷保赤之誠勤農勸稼俯惟蔀屋資生之本力穡服田令甲

爰頒

肅舉祈年之典惟寅將事用申守土之忱黍稷維馨尚冀明昭之受賜來牟率育庶俾豐裕於

蓋藏

尚饗

城隍廟

每月朔望日詣廟拜謁又春秋仲月上戊日合祭

於風雲雷雨山川壇又厲壇亦以神主其祀

邑厲壇

每歲春清明日秋七月望日冬十月朔日祭無祀
鬼神先期縣令具文致告城隍之神至期迎神位
於厲壇主其祀羊三豕三米三石羹飯有差香燭
酒紙隨用分祭

馬神廟

每歲春秋仲月上戊日用牲醴香燭祀先牧馬祖
馬步馬社司馬五神

八蜡廟

一先嗇二司嗇三農四郵表畷五貓虎六坊七水

庸八百種每歲春秋仲月上戊日用特醴香燭於祠中拜奠

火神廟

祭期與社稷同儀物與馬蜡等祠同

土地祠

每歲春秋仲月戊日祭月朔望拜謁

關帝廟

歲春秋仲月上戊日及仲夏十三日三祭邑令朝服率僚屬行三獻禮牛一羊一豕一簋簋各二籩

豆各十帛一爵三釧二

春秋同日祭帝曾祖光昭公祖裕昌公考成忠公
三獻帛各一羊各一豕各一簋簋各二籩豆各八
爵各三釧各一夏祭去籩豆用果品五盤

忠孝節義祠

每歲春秋仲月戊日用牲醴香燭拜奠

薄蝕

朔朝望夜偶日月食設香案於露臺上設金鼓於儀
門兩旁邑令朝服率僚屬於初食時向之行禮執

事者奉鼓令伐鼓三聲衆鼓齊鳴俟報復圓仍行
禮乃退

讀法

每月朔望邑令率僚屬供

聖諭十六條於公所齊集士民行禮約正宣講

廣訓及律令數條畢仍行禮退

鄉飲

制鄉飲酒禮每正月望十月朔於明倫堂舉行邑令

據儒學牒先期啓請紳士耆民德望宜賓介者屆

期速客迎庠門外賓西主東三揖三讓升堂東西

向再拜就坐大賓

致仕官員

位西北僕賓

年高有德人

位東

北介賓

次長者

位西南主人

正官

位東南三賓

賓之以次

以

次位賓西後司正

學官

位主東後北面衆賓正西東

向僚屬正東西向各就位司正中堂北面揖賓主

皆揖執事者授觶司正舉酒曰恭惟

朝廷率由舊章敦崇禮教舉行鄉飲非爲飲食凡我長

幼各相勸勉爲臣盡忠爲子盡孝長幼有序兄友

弟恭內睦宗族外和鄉里無或廢墜以忝所生畢

司正飲酒授執事者解揖賓主皆揖各復位執事者中堂設律令案賓主皆拱讀律令者詣案前北面立讀畢復位供饌主人獻賓薦脯醢設折俎賓酬主人如之獻僎介僎介酬亦如之飲酒供湯凡三工以次升歌鹿鳴南山湛露三詩飲畢徹饌賓主兩拜訖又賓僎介衆賓拜訖三揖出庠門退古禮工入升歌笙入間歌合樂歌詩十二章今仍鹿鳴南山二章易置湛露章

賓興

凡生員應闈試邑令啟請設席禮送至京報捷後令

具金鼓旗蓋郊迎謁學行禮具鼓吹導歸第樹旗
題額其門舉人會試禮數加隆貢生禮次之

肅寧縣志卷之四終

肅寧縣志卷之五

學校志

古校序設於鄉厥後廢置靡常制宋天聖間始詔郡邑各置學所在綦爲重地我

朝重道崇儒新闕里廣追封核從祀闕書院制稱隆焉

夫聖人門深牆高自具美富而褒崇有祠聖人之本源也左右有廡聖人之羽翼也宦而有功德於民者鄉先生之沒而可祭於社者皆聖人之徒故祔之也而堂而齋而社學則黨庠家塾廣聖人之

教也宜耑紀以重文治云志學校

門殿

學宮在邑治東北元大德六年知縣焦德用增建明倫堂櫺星門講舍牆垣皇慶元年諸軍與魯勸農使陳從政重建明景泰二年主簿李經增葺五年知縣劉安儉正德十六年知縣黃霆俱重修嘉靖三十八年知縣諸應爵移置學宮前民居於別所廣門外地左右建振德育才二坊隆慶六年知縣文應奎萬六年知縣郝承健十六年知縣崔校

前後增修

國朝康熙二十三年知縣朱秉義重葺三十六年知縣王道興重建名宦鄉賢祠於大成門左右五十二年知縣黃世發雍正十一年知縣徐源遠乾隆五年知縣周傳昌累葺十一年知縣尹侃增修十六年知縣何培加修

大成殿

至聖先師孔子神位左右附四配十二哲

四配